

# Air Sungai Midah punca busuk

KOSMO  
7/10

KUALA LUMPUR - Jabatan Pengairan dan Saliran (JPS) Wilayah Persekutuan menjelaskan, kolam takungan banjir Kampung Midah di Sungai Besi berbau busuk dipercayai berpunca daripada air kotor Sungai Midah.

Pegawai Perhubungan Awam JPS, How Say Sze berkata, air kotor dari hulu sungai yang mengalir ke dalam kolam takungan banjir tersebut mungkin tercemar dan menyebabkannya berbau busuk.

"Bagaimanapun JPS akan menyiasat dengan lebih terperinci dan menyelesaikan masalah ini secepat mungkin," katanya bagi mengulas laporan *KOSMO!* semalam mengenai rungutan penduduk Kampung Malaysia Tambahan yang dibelenggu masalah bau busuk.

Dakwa penduduk, masalah itu datang daripada kolam takungan banjir Kampung Midah yang terletak tidak jauh dari kediaman mereka.

Menurut Say Sze, JPS akan menaiktaraf kualiti air di kampung tersebut dan semua kolam takungan banjir yang didapati tercemar dalam masa terdekat.